


Program Munajat Bacaan Yasin dan Doa Warga Pendidik WP Labuan Kali Ke-3



Labuan : Panitia Pendidikan Islam SMK Taman Perumahan Bedaun (SMKTPB) sekali lagi berjaya menganjurkan Program Munajat Bacaan Yasin dan Doa Warga Pendidik untuk kali ke-3 sebagai langkah mencegah penularan pandemik Covid-19. Program ini mendapat jalinan kerjasama dengan Jabatan Pendidikan WP Labuan dan juga Sekolah-sekolah di WP Labuan. Majlis yang berlangsung secara dalam talian pada 25 Mac 2021 dimulakan dengan bacaan Yasin selepas solat Maghrib di kediaman masing-masing.

Turut hadir bersama dalam program ini ialah Ustazah Hajah Kamariah binti Salim, Ketua Penolong Pengarah, Sektor Pendidikan Islam, Pegawai-Pegawai JPNWPL, Pengetua-Pengetua, Guru- Guru Besar, guru-guru , ibu bapa dan juga murid-murid. En. Ag Rozlan Manan , Pengetua SMKTPB turut hadir bersama dengan barisan pentadbir dan guru-guru SMKTPB.

Menurut moderator, Ustazah Saidatun Nadiyah binti Abdul Aziz, tujuan utama program ini adalah untuk mendoakan kesihatan dan keselamatan semua warga pendidik, petugas di barisan hadapan, murid- murid, keluarga dan masyarakat agar terhindar daripada ditimpa musibah wabak Covid-19. Program ini juga bertujuan untuk memohon kepada Allah SWT agar mereka yang dijangkiti wabak Covid-19 akan kembali sembuh dengan segera dan mendoakan agar negara kita serta dunia akan bebas daripada wabak ini, di samping mendoakan kecemerlangan anak-anak yang telah selesai menduduki SPM.

Selesai bacaan Yasin dan doa yang dipimpin oleh Ustaz Mohd Daud Abdul Rahman, majlis diteruskan dengan ucapan daripada En. Ag Rozlan, Pengetua SMKTPB. Dalam ucapannya, beliau merakamkan ucapan terima kasih atas kehadiran semua secara dalam talian. Program yang berlangsung untuk kali ke-3, merupakan sebahagian daripada usaha daripada pihak sekolah dan JPNWPL dalam menangani pandemik Covid-19. Beliau turut mengharapkan agar semua urusan warga pendidik akan dipermudahkan memandangkan pembukaan semula sekolah akan berlangsung pada 05 April 2021.

En. Ag Rozlan dalam ucapannya turut tidak menafikan bahawa SMKTPB juga terkesan akibat pandemik Covid-19 kerana ada calon SPM yang terpaksa menunggu untuk penjadualan semula bagi menduduki peperiksaan SPM. Semoga semua calon SPM akan memperoleh kejayaan yang cemerlang. Beliau turut berharap agar program ini akan dapat diteruskan agar kita semua sentiasa dilindungi dan mudah-mudahan doa yang dipanjatkan akan dimakbulkan oleh Allah.

Majlis diteruskan dengan ucapan daripada Ustazah Hajah Kamariah binti Salim, Ketua Penolong Pengarah, Sektor Pendidikan Islam. Dalam ucapannya, beliau merakamkan ucapan syabas dan tahniah kepada SMKTPB kerana berjaya melaksanakan program ini untuk kali ke-3. Beliau sangat

bersyukur kerana calon SPM telah selamat menduduki peperiksaan SPM setelah tertangguh akibat pandemik Covid-19. Sememangnya anak-anak SPM 2020 merupakan insan terpilih untuk berada dalam situasi ini dan pastinya akan menjadi sejarah kepada kita semua. Beliau mendoakan agar anak-anak yang tamat menduduki SPM akan memperoleh kejayaan yang cemerlang. Ucapan syabas dan tahniah juga dirakamkan kepada semua sekolah kerana berjaya mematuhi SOP yang telah ditetapkan dalam menjalani norma baharu ini terutama sekali yang melibatkan pergerakan murid-murid di sekolah.

Semoga usaha kita semua akan dapat membantu memutuskan rantaian pandemik Covid-19. Sesungguhnya setiap musibah yang Allah turunkan ada hikmahnya yang tersendiri. Salah satunya, beliau mendapati guru-guru kini semakin kreatif menggunakan teknologi maklumat untuk melaksanakan PdPr masing-masing demi memastikan anak murid tidak tercicir dalam pembelajaran. Pada akhir ucapannya, beliau berharap agar wabak ini segera diangkat oleh Allah SWT dan mendoakan agar kita semua dapat menjalani kehidupan seperti biasa.

Majlis diakhiri dengan solat Isyak dan solat Hajat di rumah masing-masing.

Berita Oleh : SMK Taman Perumahan Bedaun